

हिब्रूतयूत च्वःगु पौ म्हसीका

थ्व पौ ख्रीष्टयात विश्वास याःपि यहदीतयूत च्वःगु खः। विरोध अप्वया वःगुलि इमिगु विश्वास कमजोर जूगु खः। थ्व पौलय् येशू ख्रीष्ट हे सत्य खः, वयकः व परमेश्वर उतिग्यं, वयकलं परमेश्वरयागु हे स्वभाव क्यनादिल धकाः इमिगु विश्वास बल्लाकेत स्वःगु दु। थ्व पौ च्वम्हयूसिनं थःगु नां बियातःगु मदु। थुकथं थुकी स्वता खःगु खँय् बःबियातःगु दु -

१. येशू परमेश्वरया सदां दयाच्चनीम्ह काय् खः, गुम्हयूसिनं न्ह्यार्थे ज्याःगु दुःखकष्ट फयेमाःसां परमेश्वरयागु आज्ञा मानय् यायेगु त्वःतामदी। परमेश्वरया काय् येशू पुलांगु नियमया फुक्क अगमवत्तात, स्वर्गदूतत व मोशा स्वयाः नं तःधंम्ह खः।
२. येशूयात परमेश्वरं हे सदां दयाच्चनीम्ह व पुलांगु नियमय् च्वपि पुजाहारीत स्वयाः तःधंम्ह पुजाहारी यानाः छ्वयाहयादीगु खः।
३. येशूपार्खे विश्वासीत पाप, भय व मृत्युं बचय् जुइ धुंकूगु दु। बलि बीगु व छायाछी यायेगु ज्या किपालु कथं जक यहदी धर्मय् यानावयाच्चंगु खः। धात्थेगु मुक्ति ला येशू थः हे तःधंम्ह पुजाहारी जुयाः झायाबियादी।

११ अध्यायलय् न्हापा न्हापायापि नांजाःपि यहदीतयूगु विश्वासयात दसु कथं न्ह्यथनाः च्वमिं इमित नं न्ह्यार्थे ज्याःगु दुःखकष्ट वःसां विश्वास मत्वःतुसे मन बियाः येशूयागु लँ स्वयाच्चनेत इनाप यानातःगु दु। थ्व पौ च्वम्हयूसिनं हिब्रूतयूत इपिं विश्वासं लिचिल धाःसा परमेश्वरयागु ग्यानापुगु इन्साफ इमिथाय् वइ धकाः ख्याच्चः नं बियातःगु दु। थज्याःगु हे मेमेगु अतीं व ख्याच्चः बियाः थ्व पौ क्वचाय्कातःगु दु।

धलः पौ

येशू ख्रीष्ट व परमेश्वर उतिग्यं १:१-३

येशू ख्रीष्ट स्वर्गदूतत स्वयाः तःधं १:४-२:१८

येशू ख्रीष्ट मोशा व यहोशू स्वयाः तःधं ३:१-४:१३

येशू ख्रीष्ट मेपि पुजाहारीत स्वयाः तःधं ४:१४-७:२८

येशू ख्रीष्टयागु बाचा पुलांगु बाचा स्वयाः तःधं ८:१-९:२८

येशू ख्रीष्टयागु बलिदान मेमेगु बलि स्वयाः तःधं १०:१-३९
 विश्वास हे दक्वसिबय् तःधं ११:१-१२:२९
 मेमेगु अती व क्वचाय्कूगु १३:१-२५

हिब्रू

वय्कःया काय्पाखें परमेश्वरं नवानादीगु
 यूह १:१-१८

1 न्हापा न्हापा अगमवत्तातय्पाखें परमेश्वरं झी तापाःबाज्यापि नाप तःकः मछि
 तःकथं नवानादिल। 2 तर आः दक्वसिबय् लिपा वय्कः थः काय्पाखें झीपिलिसें
 नवानादीगु दु। काय्यात हे वय्कलं फुक्क सृष्टिया हामा यायेत ल्ययादिल।
 वय्कःपाखें हे थ्व संसारयागु सृष्टि यानादिल।

3 वय्कलं नवानादीगु खँय् हे थ्व संसार न्ह्यानाच्च्वंगु दु। परमेश्वरयागु महिमाया
 जः वय्कःयाके दु। वय्कः व परमेश्वर उतिग्यं। वय्कःया शक्ति दुगु वचनं हे थ्व
 संसार न्ह्यानाच्च्वंगु दु। मनूतय्त पापं छुतय् यानादी धुंकाः वय्कः दक्वसिबय् तःधंम्ह
 परमेश्वरयागु जवय् च्वनादीगु दु।

स्वर्गदूतत स्वयाः परमेश्वरया काय् तःधं

4 स्वर्गदूतत स्वयाः परमेश्वरं वय्कःया काय्यात तःधं यानादिल। इपि स्वयाः
 तःधं धकाः सीकेत परमेश्वरं वय्कःयागु नां हे तःधंकादिल।

5 धर्मशास्त्रय् नं परमेश्वरं वय्कःया काय्यात थथे धयादीगु खँ झीसं ब्वनागु दु

“छ जिम्ह काय् खः,
 थौनिसें जि छिमि बाः जुल।”

अले हानं धयादिल –

“जि वया बाः जुइ,
 अले व जिम्ह काय् जुइ।”

परमेश्वरं स्वर्गदूततय्त थथे गुब्सं धयामदी।☆

6 वय्कलं थः दकलय् तःधिकःम्ह काय्यात संसारय् छवया हयादीबलय् थथे
 धयादिल –

☆ 1:5 १:२५ भज २:७; २ शमू ७:१४; १ इति १७:१३

“फुक्क स्वर्गदूततयसं
वय्क्कःयागु आराधना
यायेमाः।” ☆

7 स्वर्गदूततयगु बारे वय्कलं धयादी,
“वय्कलं थः दूततयत् फय्,
थः दासतयत् मित्याः यानादी।”☆

8 काय्यागु खँय् धाःसा वय्कलं थथे धयादीगु दु –
“हे परमेश्वर, छिगु सिंहासन
सदां सदां दयाच्चनी।
छिं छिगु राज्यय् च्वपिं मनूतयत्
फुक्कसितं उतिग्यंक्
न्याय यानाः
बांलाक शासन यानादी।
9 छितः भिगु ज्याखँ जक् यः,
अले मभिं ज्याखँ छितः मयः।
अय्जूगुलि हे खः, परमेश्वरं,
छिम्ह हे परमेश्वरं,
छितः ल्ययाः
मेपिं फुक्कसित स्वयाः
तःधंकाः लय्ताय्कादीगु।”☆

10 हानं थथे च्वयातःगु दु –
“परमप्रभु, दकलय् न्हापालाक
छिं हे पृथ्वी सृष्टि यानादिल,
अले थःगु हे ल्हातं
आकाश दय्कादिल।

11 उपिं फुक्कं मदया वनीतिनि,
छि धाःसा सदां दया हे च्वनी।
छिं दय्कूगु फुक्कं
वसः भ्वाथः जू थें

भ्वाथः जुया वनीतिनि।

12 गा लथ्याय् थें

छिं आकाश नं लथ्यानादी,

अले वसः हिले थें

उमित नं हिलादी।

छि धाःसा सदां उत्थें जुयाच्चनी,

छिगु जीवन गुबलें फुइ मखु।”☆

13 परमेश्वरं स्वर्गदूततयत् थथे गुब्सं धयामदी।

“जिं छं शत्रुतयत्

छंगु पालि तःले मततले

छ जिगु जव लहाःपाखे

चवनाच्चँ।” ☆

14 अयसा स्वर्गदूतत धयापिं सु खः लय? इपिं परमेश्वरयात सेवा याइपिं आत्मात खः। अले मुक्ति काइपिं मनूतयत् ग्वाहालि यायेत छवयाहःपिं खः।

2

तःधंगु मुक्ति

1 अयजूगुलिं झीसं न्यनागु परमेश्वरयागु सत्य व भिंगु खँयात क्वानुक्तु ज्वनाः चवनेमाली, मखुसा झीसं लँ टुंकी।

2 परमेश्वरं स्वर्गदूततय्पाखें बियातःगु व्यवस्था सत्य खः। अले थ्व खँ मानय् मयाःपिन्त सजाँय बियादिल धासेलि

3 थपाय् मछिधंगु मुक्तियात झीसं च्यूताः मतल धाःसा झीत सजाँय बियामदी ला? प्रभु थःम्हयसिनं हे दकलय् न्हापालाक थ्व मुक्तियागु खँ न्यंकादिल। न्यपिन्सं थ्व खँ सत्य खः धकाः झीत क्यनाबिल।

4 अले हानं थ्व खँ सत्य खः धकाः झीत क्यनेत परमेश्वरं हे ततःधंगु शक्ति व अजू चायापुगु ज्या व चिं यानादिल। परमेश्वरं थःत यःपिन्त पवित्र आत्मायागु वरदान नं बियादिल।

मुक्ति बियादीम्ह येशू ख्रीष्ट हे खः

5 जिमिसं धयाच्चनागु लिपा वइगु संसारयात परमेश्वरं स्वर्गदूततयगु लहातय् बियामदी।

6 धर्मशास्त्रय् नं छम्हयसिनं थुकथं साक्षी बियातःगु दु –

“मनू छु हे खः धकाः

छिं वयात बिचाः यानाच्चनेत?

मनूया काय् छु हे खः धकाः

छिं वयात लुमंकाच्चनेत?

7 छिं वयात स्वर्गया दूतत स्वयाः

भचा जक क्वय् तयादिल।

नापं छिं वयात महिमा

व इज्जत नं बियादिल।

8 छिं वयात दय्कादीगु फुक्कयागु

अधिकार नं बियादिल।”☆

परमेश्वरं वय्कःयात दक्व फुक्कया हामा यानादिल। अथेसां दक्व फुक्कं वय्कःयागु बसय् लाःगु झीसं मखंनि।

9 अथेसां झीसं वय्कःयात थुकथं हे खनाच्चना, गुम्हयसित छुं ईया लागि स्वर्गदूतत स्वयाः भचा चिधं यानादीगु खः। अले परमेश्वरयागु दया मायां यानाः वय्कः फुक्क मनूतयगु निति सिनादिल। थथे सिनादीगुलि वय्कःयात तःधंकाः च्वय् तयादिल।

10 सृष्टि यानादीम्ह व न्ह्याकादीम्ह परमेश्वरं थः मस्ततय्त मुक्ति बीत थथे थःकाय्यात दुःखकष्ट सीके बियादीगु पाय्छि जू। अले मुक्ति बीम्ह वय्कः हे जक खः।

11 पवित्र याःम्ह व पवित्र यानातःपिं फुक्कं छगू हे परिवारयापिं खः। अय्जूगुलि वय्कलं पवित्र जूपिं मनूतय्त थः किजापिं धकाः धयादीत लज्या चायामदी।

12 थ्व हे खँ धर्मशास्त्रय् थथे च्वयातःगु दु –

“जिं जिमि मनूतय्त

छिं यानादीगु खँ कने,

जिं छितः इमिगु पुचलय् तःधंके।”☆

13 अले थथे नं च्वयातःगु दु –

“परमेश्वरयाके हे
जिं भरोसा तयाचवने।”

अले थथे नं च्वयातःगु दु –
“स्व, परमेश्वरं जितः बियादीपि
वय्कःया काय्म्ह्याय्पि नाप
जि च्वनाच्वनागु दु।”☆

14 उपि काय्म्ह्याय्पि ला व हिया शरीर जूगुलि येशू नं उपि थें हे ला व हि दुम्ह
मनू जुयादिल। थुकथं वय्कलं मनू जुयाः सिनाः मृत्युयागु शक्ति दुम्ह शैतानयात
बुकादिल।

15 सी धकाः ग्यानाः सदां शैतानया दास जुयाच्वंपि मनूतय्त छुतय् यायेत वय्कलं
थथे यानादीगु खः।

16 वय्कलं स्वर्गदूततय्गु निति थथे यानादीगु मखु, बरु अब्राहामया सन्तानतय्गु
निति यानादीगु खः।

17 दक्व खँय् वय्कः थः हे दाजुकिजा थें जुयादी माल। थुकथं परमेश्वर व झीगु
दथुइ च्वनाः झीगु पापया प्रायश्चित यायेत दयादुम्ह व विश्वास याये बहःम्ह दकलय्
तःधंम्ह पुजाहारी थें जुयादिल।

18 वय्कः थःम्हं नं जाँचय् लानादीबलय् यक्व दुःखकष्ट सियादीगुलि जाँचय्
लाःपिन्त नं ग्वाहालि यानादी फु।

3

मोशा स्वयाः येशू तःधं

1 यःपि दाजुकिजापि, छिमित हे खः, परमेश्वरं सःतादीगु। झीसं विश्वास
यानाच्वनाम्ह येशूयात हे परमेश्वरं छ्वयाहयाः दकलय् तःधंम्ह पुजाहारी
यानादिल। वय्कःयाके थःगु मन तया च्वँ।

2 परमेश्वरयागु ज्याय् मोशा विश्वास याये बहःम्ह जू थें, येशू नं परमेश्वरं याके
हयादीगु ज्याय् विश्वास याये बहःम्ह जुयादिल।☆

3 छँ स्वयाः छँ दयक्महयसिया इज्जत तःधं जुइ। अथे हे मोशा स्वयाः येशू यक्व
अप्वः इज्जत याये बहःम्ह जुयादिल।

४ फुक्क छै मनुतयस हे दयकूगु खः। अयनं दक्व फुक्कं दयकादीम्ह ला परमेश्वर हे खः।

५ परमेश्वरयागु छैय् मोशा विश्वास याये बहःम्ह च्यः थें जुल। अले परमेश्वरं लिपा धयादीगु खँयागु साक्षी वं हे बियावन।

६ ख्रीष्ट धाःसा परमेश्वरयागु छैय् अधिकार दुम्ह काय् थें विश्वास याये बहःम्ह जुयादिल। झीसं आशा याना थें उत्थें साहस व भरोसा तयाच्चन धाःसा झीपि हे परमेश्वरया छै जुइ।

विश्वास यायेगु त्वःताछ्वये मते

७ पवित्र आत्मां थथे धयादीगु दु —

“थौं छिमिसं परमेश्वरयागु सः
ताल धाःसा,

८ छिमि तापाःबाज्यापिन्सं थें
छिमिसं वय्कःयात मभिंकाः
थःगु नुगः छाके मते।

मरुभूमिइ इमिसं
वय्कःयागु मन स्वल।

९ जिं पिइदँ पिइदँ तक
ततःधगु अजू चायापुगु ज्या
याःगु खंक खंक नं

छिमि तापाःबाज्यापिन्सं
मरुभूमिइ जिगु मन स्वल।

१० अयजूगुलि तंम्वयकाः
जिं इमित थथे धया —
‘छिमिगु मन थाःगाः दइ मखु,
छिमिसं जिगु लँपु मसिल।’

११ अयजूगुलि जिं तमं पाफयाः
थथे धया —
‘छिमिसं गुबलें नं
जिं बीगु आराम काये
खनी मखु।’ ”☆

12 यःपि दाञ्जुकिजापि, होश यानाच्चँ। छिपिं सुं नं म्वाःम्ह परमेश्वरयात त्वःताः विश्वास मयाइपिं व जिद्दी जूपिं जुइ मते।

13 “थौँ” धयागु ई दतले छिमिसं थःथवय् साहस बीगु याना च्वँ। मखुसा पापं यानाः छिमिगु नुगः तसकं छाइ।

14 झीसं न्हापांनिसें लिपा तकं विश्वास थातं तयाच्चवने फुसा झीपिं ख्रीष्टनापं च्वने दइ।

15 थथे धयातःगु हे दु –

“थौँ छिमिसं परमेश्वरयागु सः

ताल धाःसा

छिमि तापाःबाज्यापिन्सं थें

छिमिसं वय्कःयात मभिकाः

थःगु नुगः छाके मते।”☆

16 सुनां परमेश्वरयागु सः तायाः नं वय्कःयात हे मभिकल? मोशां मिश्र देशं लिगनाहःपिं मनूत हे, मखु ला?

17 सु नाप परमेश्वर पिइदँ तक तंम्वय्कादिल? पाप यानाः मरुभूमिइ सिनावपिं नाप हे, मखु ला?

18 थथे खँ मन्यपिन्त हे परमेश्वरं “छिमिसं जिं बीगु आराम कायेखनी मखु” धकाः पाफयादीगु, मखु ला?☆

19 परमेश्वरयात विश्वास मयाःगुलि हे इपिं वय्कलं इमित बी धयादीगु देशय् दुहां वने मखंगु खः।

4

झासु लनेगु ई वइतिनि

1 थथे झासु लंके बियादी धकाः परमेश्वरं पाफयादीगु झीगु निति नं खः। उकिं होश या, छिपिं मध्ये सुं नं झासु लने मखंकाः च्वने म्वाःलेमा।

2 तापाःबाज्यापिन्सं थें झीसं नं भिंगु खँ न्यना तयागु दु। भिंगु खँ न्यंसां इमित थुकिं छुं नं भिं मजुल, छायाधाःसा इमिसं न्यंगु खँयात विश्वास मयाः।

3 अयनं झीसं परमेश्वरयात विश्वास यानाच्चनागुलि झीपिं वय्कः नाप च्वनाः आराम काये खनीतिनि। विश्वास मयाःपिन्त वय्कलं थथे धयादीगु दु –

“उक्तिं जिं तमं पाफयाः धया –
 ‘छिपिं जिगु झासु लनेगु थासय्
 गुबलें दुहां वये फइ मखु।’ ”☆

संसारया सृष्टि याये धुंकूबलय् निसैं हे परमेश्वरया फुक्क ज्या सिधय् धुंक्सां
 वय्कलं थथे धयादिल –

4 धर्मशास्त्रय् न्हयन्हुखुन्हया खँय् थुकथं च्वयातःगु दु – “न्हयन्हुखुन्हया फुक्क
 ज्या सिधय्काः परमेश्वरं झासु लनादिल।”☆

5 थ्व हे खँ वय्कलं हानं झी तापाःबाज्यापिन्त थुकथं धयादिल – “छिपिं जिगु
 झासु लनेगु थासय् गुबलें दुहां वये फइ मखु।”☆

6 दकलय् न्हापालाक भिगु खँ न्यापि मन्तय्सं परमेश्वरयात विश्वास मयाःगुलि
 इमिसं झासु लने मखन। अयनं गुलिसिनं धाःसा थुकथं झासु लने खनीतिनि।

7 अयज्गुलि परमेश्वरं झीत हानं “थौ” धकाः मौका बियादीगु दु। दाऊदयापाखें
 नं वय्कलं थ्व हे खँ धाय्कादीगु खः –

“थौ छिमिसं परमेश्वरयागु सः
 ताल धाःसा
 छिपिं जिदी जुइ मते।”☆

8 यहोशू इम्राएली मन्तयत्त झासु लंके ब्यगु जूसा वय्कलं हानं “मेगु दिनयागु”
 खँ धाय्कादी मखुगु।☆

9 अयज्गुलि परमेश्वरया मन्तयगु नितिं विश्रामबारया झासु लनेगु ई ल्यंदनी।

10 गथे सृष्टि यानादी धुंकाः वय्कलं झासु लनादिल, अथे हे झासु लने थ्याःम्ह
 मनुखं नं वय्कलं थें ज्या याये म्वायेक झासु लने खनी।☆

11 थथे जूगुलि झीसं नं फक्व कुतः यानाः झासु लने थाय् वनेगु स्वये माल।
 तापाःबाज्यापिन्सं वय्कःयात मानय् मयाःगुलि वय्कः नाप झासु लने मखन, उक्तिं
 झीसं नं इमिसं थें याये मज्यु।

12 छाय्धाःसा परमेश्वरयागु वचन ज्या याना तुं च्वनीगु व जीवन बीगु खः।
 थ्व निखें धाः दुगु तरवार स्वयाः नं ज्वः, थ्वं दुने थ्यंक वनाः प्राण व आत्मायात

☆ 4:3 ४:३ भज ९५:११ ☆ 4:4 ४:४ उत २:२ ☆ 4:5 ४:५ भज ९५:११ ☆ 4:7 ४:७ भज
 ९५:७-८ ☆ 4:8 ४:८ व्य ३१:७; यहो २२:४ ☆ 4:10 ४:१० उत २:२

छुतय् यानाबी, साहा: व स्य:यात छुतय् यानाबी। अले मनूतयग्गु नुगलय् च्वंगु खँ व इच्छायात ल्यया: जाँचय् याइ।

13 परमेश्वरं मखंगु छुँ हे मदु। सृष्टियागु फुक्क खँ वय्कलं खं। थ्व हे परमेश्वरयात झीसं थथ:गु ल्या:चा: बीमा:।

दकलय् त:धंम्ह पुजाहारी येशू हे ख:

14 स्वर्गय् झायादीम्ह परमेश्वरया काय् येशू हे झी दक्वसिबय् त:धंम्ह पुजाहारी जूगुलि झीसं मानय् याना: वयागु विश्वासयात अज्जं क्वातुकाच्वनेमा:।

15 झी दकलय् त:धंम्ह पुजाहारी झी बमलाइबलय् छुँ याये मफुम्ह मखु, बरु झीत थें वय्क:यात नं फुक्क खँय् शैतानं जाँचय् यात, अय्सां वय्कलं पाप यानामदी।

16 अय्जूगुलि झीपि भचा हे मग्यासे परमेश्वरया सिंहासनया न्ह्य:ने वनेनु। अले वय्कलं झीत दया याना: मा:बलय् मा:कथं झीत ग्वाहालि यानादी।

5

1 परमेश्वरनापं स्वापु दुगु खँय् मनूतय्पाखें इमिगु पापया निति बलि बित व छाय्छी यायेत न्हापा न्हापा मनूतय्गु हे पुचलं दकलय् त:धंम्ह पुजाहारी ल्यइगु ख:।

2 थज्या:म्ह पुजाहारी थ: नं बमला:म्ह जूगुलि मस्यूपिं व मखुगु लँय् जुइपिनाप नं क्वमिल जुया: खँ ल्हाये फइ।

3 अय्जूगुलि वं मेपिनिगु पापयागु निति बलि बीबलय् थ:गु हे पापयागु निति नं बलि बीमा:।✧

4 सुं मनु थथ:म्हं दकलय् त:धंम्ह पुजाहारी जुइ मखु। हास्नयात परमेश्वरं दकलय् त:धंम्ह पुजाहारी यानादी थें तुं मेपिन्त नं वय्कलं हे दकलय् त:धंम्ह पुजाहारी ल्ययादी।✧

5 अथे हे ख्रीष्ट नं थथ:म्हं तुं दकलय् त:धंम्ह पुजाहारी जुयादीगु मखु, बरु परमेश्वरं हे वय्क:यात ल्यया: थथे धयादिल –

“छ जिम्ह काय् ख:,

थौनिसें जि छिमि बा: जुल।”✧

6 हानं मेथाय् थथे च्वयात:गु दु –

“मल्कीसेदेक थें

छ न्ह्याबलेया लागिं

पुजाहारी खः।”☆

7 संसारय् दीबलय् हे येशू मिखाय् ख्वबि हाय्काः थःत हानं म्वाका दीम्हय्सित बिन्ति व प्रार्थना यानादिल। वयकः क्वमिल्लुम्ह जूगुलि व बाःयात दुनुगलंनिसैं मानय् यानादीम्ह जूगुलि वयकःयागु बिन्ति व प्रार्थना परमेश्वरं न्यनादिल।☆

8 परमेश्वरया काय् जुयाः नं वयक्कलं थःम्हं स्यूगु दुःखकष्टं यानाः परमेश्वरयागु आज्ञा मानय् यायेगु सयकादिल।

9 अले छकः फुक्क पूवंम्ह जुयादी धुंकाः वयकः थःगु आज्ञा मानय् याइपिन्त सदां दयाच्चवनीगु मुक्ति बियादीम्ह जुयादिल।

10 परमेश्वरं वयकःयात मल्कीसेदेक थें दकलय् तःधंम्ह पुजाहारी यानादिल।

विश्वासयात मत्वःतेगु ख्याच्चः

11 थ्व खँय् धायेमानिगु यक्व हे दु, अयनं छिमिसं मथूगुलि छिमित थुइकेत थाक्, छायधाःसा छिमिगु न्यनेगु शक्ति कम जुयावने धुंकल।

12 आः ला छिपिं मेपिन्त स्यनीपिं जुइमाःगु खः। अयनं परमेश्वरयागु खँय् छुं हे मस्यूनिगुलि छिमित मेपिन्सं स्यनेमाः थें च्वं नि। छिपिं दुधंगु नसा नये मफुनिपिं मांयागु दुरु त्वने मानिपिं थें जुयाच्चन।

13 मांयागु दुरु जक त्वनाच्चनीम्ह ला अझं मचा हे तिनि जुइ। थज्याःम्हय्सिनं छु भिं, छु मभिं धकाः थुइके फइ मखु।☆

14 दुधंगु नसा ला तःधिकःपिनिगु निती खः। इमिसं थःगु अनुभवं भिंगु छु खः, मभिंगु छु खः धकाः बांलाक ल्यये फइ।

6

1 अय्जगुलि ख्रीष्टयागु न्ह्यखँ जक सयका च्वनेगु त्वःताः मेमेगु दुग्यंगु व ततःधंगु खँ नं सीकेमाः। मखुगु, मभिंगु व परमेश्वरयात मयःगु ज्याखँ यायेगु त्वःताः पश्चाताप यायेगु, वयकःयात विश्वास यानाच्चनेगु,

2 बाप्तिस्मा कायेगु, छेनय् ल्हाः तयाः प्रार्थना यायेगु, सीपिं हानं म्वाना वइगु, अले दकलय् लिपा याइगु न्याययागु खँ जक झीसं लिसा लिसा कयाः स्यनाच्चने मजिल।

3 परमेश्वरं झीत थुलि अप्वः सयके ब्यसा झीसं सयका वने।

☆ 5:6 ५:६ भज ११०:४ ☆ 5:7 ५:७ मती २६:३६-४६; मर्क १४:३२-४२; लूक २२:३९-४६ ☆ 5:13 ५:१२-१३ १ कोर ३:२

4 छकः परमेश्वरयागु जः काये धुंकूपि, स्वर्गयागु वरदान काये धुंकूपि व पवित्र आत्मां जाये धुंकूपिन्त हानं पश्चाताप याके फइ मखु।

5 थुकथं वयकः नाप मिलय् जुइ धुंकूगुलि वयकःयागु खँ भिं धकाः थुमिसं स्यू। परमेश्वरयागु राज्ययागु अजू चायापुगु शक्ति गय च्वं धकाः नं थुमिसं थुइके धुंकल।

6 अयनं हे थुमिसं वयकःयात त्वःतावन धाःसा थुमित पश्चाताप याकाः हानं लित हये फइ मखु। छायाधाःसा थुमिसं हानं छकः फुक्कसिया न्ह्यःने परमेश्वरया काय्यात कूसय् यख्खानाः बेइज्जत याइ।

7 परमेश्वरं हे पृथ्वीइ वा वयकादीगुलि बुँज्या याइपिन्सं थःपिन्त माःगु अन्न सयकी। थुकथं इमिसं वयकःयागु आशिष काइ।

8 कं व घाँय् जक बुयावल धाःसा व बुँ ज्यालगय् जुइ मखु। उकी ला परमेश्वरयागु सराः लाइ, अले मि तइ।*

9 यःपिं दाजुकिजापिं, जिमिसं थथे धयासां छिमिगु बारे थ्व स्वयाः भिंगु व मुक्तिनापं स्वापु दुगु खँयागु हे जिमिसं भरोसा कयागु दु।

10 परमेश्वरं अन्याय यानादी मखु। छिमिसं यानाच्चंगु वयकःयागु ज्या व वयकःयात माया यानाच्चंगु खँ, अले दाजुकिजापिन्त ग्वाहालि याःगु व यानाच्चंगु खँ नं वयकलं ल्वःमंकादी मखु।

11 थुकथं हे छिमिसं मन तयाः लिपा तकं कुतः यानाच्चनी धकाः जिमिसं मनं तुनाच्चना। अले छिमिगु आशा नं पूवनी।

12 छिपिं अल्छी जूगु जिमित मयः, बरु दुनुगलनिसें परमेश्वरयात विश्वास याःपिं मनूतयसं थें वयकलं बी धयादीगु कायेत कुतः या।

परमेश्वरं धयादीगु खँ पक्का जू

13 परमेश्वरं अब्राहामयात बचं बियादीबलय् थः स्वयाः तःधंमह सुं हे मदुगुलि थःगु हे नामं थथे पाफयादिल –

14 “जिं छन्त आशिष बी,
अले छं सन्तान नं
यक्व दयकाबी।”*

15 अब्राहाम हथाय् मचासे पियाच्चंगुलि परमेश्वरं बियादी धकाः बचं बियादीगु आशिष वयात दत।

- 16 मनूतयूसं थः स्वयाः तःधंमहयसिगु नामय पा फइ। अले थःगु द्वंबिट्टं नं भिकी।
 17 परमेशवरं बी धकाः धयादीपि मनूतयूत थःमहं बी धकाः धयादीगु खँ पाइ मखु
 धकाः नं पाफयादिल।
 18 थथे गुब्सं हिली मखुगु थ्व निता खं वयकःपाखें बचय् जुया च्वनापिं झीत नं
 झीसं आशा यानाच्वनागु खँय् बल्लाना च्वनेत साहस बी।
 19 थ्व हे आशाय् झीपिं म्वानाच्वनागु दु। थ्व धात्थें व पक्का खः। अले थ्व
 देगलय् च्वंगु पर्दाया दुने थयंकः थयं।✧
 20 झीगु नितिं येशू न्ह्यः हे मल्कीसेदेक थें सदांया लागि दकलय् तःधंमह पुजाहारी
 जुयाः अन दुहां झाये धुकल।✧

7

अब्राहाम स्वयाः मल्कीसेदेक तःधं

- 1 थ्व मल्कीसेदेक शालेमयाम्ह जुजु, अले दकलय् तःधंमह परमेशवरया
 पुजाहारी खः। लडाइँलय् जुजुपिन्त त्याकाः लिहां वयाच्वंमह अब्राहामयात नाप
 लानाः मल्कीसेदेकं आशिष बिल।
 2 अब्राहामं जुजुपिन्त त्याकाः हःगु सम्पतियागु झिब्वय् छव्व मल्कीसेदेकयात
 बिल। मल्कीसेदेकया नांया अर्थ “धार्मिकताया जुजु” खः, अले शालेमयाम्ह जुजु
 जूगुलि वयागु नांयागु अर्थ “शान्तिया जुजु” धकाः नं थुइक्।✧
 3 वया मांबौ व तापाःबाज्यापिनिगु खँ गनं हे च्वयातःगु मटु। अले व सीगु व बूगु
 खँ नं गनं च्वयातःगु मटु। व परमेशवरया काय् थें सदांयात पुजाहारी जुयाच्वनी।
 4 मल्कीसेदेक गुलि तःधंमह खः धकाः छिमिसं हे थुइकेफु। झी तापाःबाज्या
 अब्राहामंनापं वयात थःमहं लडाइँलय् त्याकाः हःगु सम्पतियागु झिब्वय् छव्व बिल।
 5 लेवीया पुजाहारी जुयाच्वंपिं सन्तानं व्यवस्थाय् च्वया तः थें थः हे इस्राएली
 दाजुकिजापिन्के इमिसं कमय् याःगु झिब्वय् छव्व कयाच्वन। लेवीया सन्तान व
 इस्राएलीत फुक्कं अब्राहामया हे सन्तान खः।✧
 6 मल्कीसेदेकं लेवीया सन्तान मखुसां अब्राहामयाके झिब्वय् छव्व सम्पत्ति
 काल। अले हानं परमेशवरं बाचा चिनादीमहयूसित हे आशिष बिल।
 7 तःधंमहयूसिनं चिधंमहयूसित आशिष बी धकाः ला सि हे स्यु।

✧ 6:19 ६:१९ लेवी १६:२ ✧ 6:20 ६:२० भज ११०:४ ✧ 7:2 ७:१-२ उत १४:१७-२० ✧ 7:5
 ७:५ गन्ती १८:२१

8 छखे सीमानिपि पुजाहारीतयसं झिब्वय् छब्व काल, मेखे गुबलें मसीम्ह धयातःम्ह मल्कीसेदेकं झिब्वय् छब्व काल।

9 थथे नं धायेफु – “झिब्वय् छब्व काइम्ह लेवीं नं अब्राहामपाखें मल्कीसेदेकयात झिब्वय् छब्व बिल।”

10 छायाध्याःसा मल्कीसेदेकं अब्राहामयात नापलाःबलय् लेवी थः तापाःबाज्या अब्राहामयागु म्हय हे दु।

11 लेवी पुजाहारीतयगु ज्यां हे झीपि बचय् जुइगु खःसा मेम्ह पुजाहारी छाया माल? थ्व मेम्ह पुजाहारी हास्न थें मखु, बरु मल्कीसेदेक थें खः।

12 मेम्ह पुजाहारी हिलीबलय् व्यवस्था नं हिलेमाः।

13 थ्व धयाच्चवनागु मेगु हे कुलयाम्हयसिया बारे खः। वय्कःया कुलयापि सुनानं पुजाहारीया ज्या याःगु मदु।

14 येशू ख्रीष्ट यहदा कुलय् बूम्ह खः धकाः ला फुक्कसिनं स्यू। मोशां पुजाहारीयागु खँ ल्हाःबलय् यहदा कुलयागु नां मकाः।

मल्कीसेदेक थें ज्याःम्ह मेम्ह पुजाहारी

15 थ्व खँ आः झन बांलाक सी दइ – मल्कीसेदेक थें ज्याःम्ह मेम्ह पुजाहारी वये धुंकल।

16 वय्कः व्यवस्थाकथं पुजाहारी जुयादीगु मखु, बरु सदां दयाच्चवनीगु जीवनयागु शक्ति जुयादीगु खः।

17 धर्मशास्त्रय् हे थथे च्वयातःगु दु –

“मल्कीसेदेक थें

छ नं न्ह्याबलेंया लागिं

पुजाहारी खः।”☆

18 न्हापायागु व्यवस्था ज्यालगय् मज्जु जूगुलि लिकया छवये धुंकल,

19 छायाध्याःसा व्यवस्थां झीत छुं हे याये मफुत। आः धाःसा झीत वया सिबय् भिंगु आशा बियादीगु दु। गुकिं झीत परमेश्वरया न्ह्यःने थयंकी।

20 परमेश्वरं मेपिन्त पाफयाः पुजाहारी यानादीगु मखु, तर वय्कःयात पाफयाः पुजाहारी यानादीगु खः।

21 येशूयात वय्कलं पाफयादीगु खँ थुकथं च्वयातःगु दु –

“परमेश्वरं थःगु मन हिले मखु
धयाः थथे पाफयादिल –
‘छ सदांयात पुजाहारी जुइ।’ ”☆

22 थथे पाफयादीगुलि येशू छगू भिंगु बाचायागु जमानी जुयादिल।

23 मेपि पुजाहारी सिनावनीपिं जूगुलि इमिसं सदां ज्या यानाच्चने मखन। अले इमिगु ल्याः नं यक्व दत।

24 येशू धाःसा सदां म्वाना च्वनीम्ह जूगुलि वय्कःया पुजाहारीया ज्या न्ह्याबलेन दयाच्चनी।

25 अय्जूगुलि हे नं वय्कःयात विश्वास यानाः परमेश्वरया न्ह्यःने वइपिन्त वय्कलं आः हे सदांया नितिं बचय् यानादी फु, छायाधाःसा इमिगु नितिं वय्कलं परमेश्वरयात न्ह्याबलेन बिन्ति यानाच्चनादीगु दु।

26 झीत मालाच्चम्ह दकलय् तःधंम्ह पुजाहारी येशू हे खः। वय्कः पवित्रम्ह व दोष मदुम्ह खः। वय्कःयात पापीतयगु पुचलं अलग तयादीगु दु, अले स्वर्ग्यं नं दकलय् तःधंम्ह यानादीगु दु।

27 वय्कलं मेपि दकलय् तःधंपिं पुजाहारीतयसं थें न्हियान्हिथं थःगु व मेपिनिगु पापयागु नितिं बलि बियाच्चने माःगु मदु, छायाधाःसा थःत लः ल्हानादीबलय् हे वय्कः सदांया नितिं छकलं बलिदान जुइ धुंकल।☆

28 व्यवस्थां सिद्ध मजूपिं मनूतय्त दकलय् तःधंम्ह पुजाहारी दयकल। व्यवस्थाया लिपा वःगु परमेश्वरं पाफयादीगु बाचाय् धाःसा वय्कःया काय्यात सदांया नितिं सिद्धम्ह पुजाहारी यानादिल।

8

येशू स्वर्ग्यं दकलय् तःधंम्ह पुजाहारी खः

1 जिमिसं धयाच्चनागु मू खँ थ्व हे खः – झीके थज्याःम्ह दकलय् तःधंम्ह पुजाहारी दु, गुम्ह स्वर्ग्यं परमेश्वरया सिंहासनया जवपाखे च्वनादी।☆

2 अन वय्कलं पवित्रगु थासय् पुजाहारी जुयाः सेवा यानादी। थ्व थाय् मनूतय्सं दय्कूगु मखु, परमेश्वरं हे दय्कादीगु खः।

3 तःधंपि पुजाहारीत फुक्कं परमेश्वरयात बी हःगु छायेत व बलि बीत तयातःपि खः। अयजूगुलि झी दकल्लय् तःधंम्ह पुजाहारीं नं छुं न छुं ला छाये हे माल।

4 वयकः थ्व संसारय् च्वनादीगु जूसा पुजाहारी जुयादी मखुगु, छायाधाःसा व्यवस्थाय् च्वया तः थें छायाछी याइपि पुजाहारीत ला थन द हे दु।

5 इमिसं पुजाहारी जुयाः थन याइगु ज्या ला स्वर्गय् जूगु ज्याखँया किपालु जक खः। मोशायात नं वं पाल ग्वयेत्यंबलय् परमेश्वरं थथे धयादीगु खः –

“जिं छन्त गुँच्वकाय्
क्यनागु नमूनाकथं
थ्व फुक्कं बांलाक दय्कि।”☆

6 येशूयात इपि स्वयाः नं तसकं तःधंम्ह पुजाहारी दयकादीगु खः। अथे हे परमेश्वर व मनूतयगु दथुइ वयकलं चिनादीगु न्हगु बाचा नं न्हापायागु पुलांगु बाचा स्वयाः तःधं, छायाधाःसा उकी अज्ज भिंगु खँया बचं बियातःगु दु।

येशू न्हगु बाचा बीम्ह खः

7 न्हापायागु बाचाय् द्रुंगु मदगु जूसा लिपायागु बाचा चिनादी माली मखुगु।

8 परमेश्वरं इमिगु द्रुं बिद्रयात क्यनाः थथे धयादिल –

“इस्त्राएलयापि व यहदायापिलिसे
जिं न्हगु बाचा चीत्यनागु ई
वयाच्वंगु दु।”☆

9 इमि तापाःबाज्यापिन्त
मिश्र देशं लिंगना हये धुंकाः
इपि लिसे चिनागु थें ज्याःगु बाचा
थ्व मखु।

जिं चिनागु बाचायात
इमिसं च्यूताः मतःगुलि नं
जिं इमित च्यूताः मयानागु खः।

10 जिं इस्त्राएलीतलिसे
चीत्यनागु बाचा थुकथं खः –
“जिं थःगु नियम इमिगु मनय्
थयंक तयाबी,

अले इमिगु नुगल्यु नं च्वयाबी।
अले जि इमि परमेश्वर जुइ
व इपि जिम्ह मनूत जुइ।’

11 ‘प्रभुयात म्हसीकी’ धका:
इमिसं थः जःलाखःलापिन्त
व दाजुकिजापिन्त नं
स्यना जुइ माली मखु,
छाय्धाःसा

चिधिकःपिन्संनिसें कयाः
तःधिकःपिन्सं तक्
जितः म्हसी।

12 इमिसं याःगु मभिंगु
बामलाःगु ज्याखँ
फुक्कं जिं क्षमा यानाबी,
अले इमिगु पाप नं
जिं लुमंके मखु।”

13 न्हगु बाचा धयादीगुलि हे परमेश्वरं न्हापायागु बाचायात पुलां यानादिल।
पुलां जुयावंगु जुक्व मदयावनी।

9

पृथ्वीइ व स्वर्ग्य जुइगु सेवा

1 न्हापायागु बाचायु नं परमेश्वरयात गथे यानाः सेवा यायेगु धयागु खँ च्वयातःगु
खः। अबलय् इमिसं पृथ्वीइ हे पवित्रगु थाय् दय्कूगु खः।

2 इमिसं पाल ग्वयाः निकू क्वथा दय्कल। न्हापांगु क्वथाय् त्वाःदेवा, तेबिल व
छायेहःगु मरि तयातःगु दइ। व थाय्यात पवित्रगु थाय् धाइ।*

3 निगुगु धकिंया दुने च्वंगु थाय्यात महा-पवित्रगु थाय् धाइ।*

4 थन लुँयागु गुँगु थनेगु वेदी व लुं भुनातःगु बाचा चिनादीगु सनू दु। व सनू दुने
लुँयागु थलय् मन्न तयातःगु दु, अले चुलि ह्वयाच्च्वंगु हासूनयागु ततां छपु, व व्यवस्था
च्वयातःगु ल्वहं पौ निपाः तयातःगु दु।* 5 थ्व सनूया घःने परमेश्वर च्वनादीगु

* 9:2 १:२ प्रस १६:१-३०; २५:२३-३०,३१-४० * 9:3 १:२३ प्रस १६:३१-३३ * 9:4 १:४ प्रस ३०:१-६;
२५:१०-१६; १६:३३; गन्ती १७:८-१०; प्रस २५:१६; व्य १०:३-५

थाय्यात किकाः करुबतय्यु पपू चक्कंकाः तसकं बांलाक तयातःगु दु। थ्व फुक्क खँ छता छता दतले आः कना च्वनेत मलाः।☆

6 थ्व फुक्क थुकथं दय्काः पुजाहारीत न्हि न्हि पवित्रगु थासय् सेवा यायेत वनी।☆

7 दुने च्वंगु महा-पवित्रगु थासय् दँय छकः दकलय् तःधंम्ह पुजाहारी जक थःगु व मेपिनिगु मसीकं याःगु पापयागु निति हि छायेत दुहां वनी।☆

8 न्हापांगु पाल दयाचवंतले महा-पवित्रगु थासय् दुहां वनेगु लँ चाइ मखु धकाः पवित्र आत्मां क्यनादीगु दु।

9 थ्व ला आःयागु ईयात क्यनादीगु छगू नमूना जक खः। थुकिं थथे धाइ — परमेश्वरयात छाये हःगुलि व बलि बीगुलि सुयागं नुगः यचुकुबी फइ मखु।

10 थथे नयेत्वनेगु व थीथी कथं म्वःल्हुइगु ला पिने क्यनेत जक खः। थज्याःगु थितिकुति न्हगु बाचा चिना मदीतलेयात जक खः।

ख्रीष्टयागु हि

11 ख्रीष्ट ला थन दुगु फुक्क भिंगु खँया दकलय् तःधंम्ह पुजाहारी जुयाः झायादीगु दु। वय्कः झन तःधंगु व सिद्धगु थासय् दुहां झायादीगु दु। थ्व मनूतय्सं दय्कूगु मखु, अले सृष्टि यानातःगु थ्व संसारयागु नं मखु।

12 वय्कः दुगुचा व द्रहंचातय्यु हि हाय्काः मखु, बरु थःगु हे हि हाय्काः उद्धार बीम्ह जुयाः छकलं हे सदांयात महा-पवित्रगु थासय् दुहां झाःगु खः।

13 दुगुचा व द्रहंयागु हि, अले होमबलिइ छाःम्ह छसु हे म्ब्यानिम्ह सायागु नौ ह्लाः ला शुद्ध मजूम्ह मनूयात शुद्ध याइ धाःसा☆

14 म्वाःम्ह परमेश्वरयागु सेवा यायेत ख्रीष्टयागु हिं झन गुलि जक झीगु नुगः यचुक हुया बीगु जुइ? ख्रीष्टं पवित्र आत्मां जायाः खू मदुम्ह बां जुयाः थःत हे परमेश्वरयात छायादिल।

15 परमेश्वरं बी धकाः धयादीगु सदां दयाच्वनीगु आशिष वय्कःया ल्ययातःपि मनूतय्सं काये दयेमा धकाः थथे न्हगु बाचा चिनाः ख्रीष्ट परमेश्वर व मनूतय्यु दथुइ च्वनादीगु खः। न्हापांगु बाचाय् मनूतय्सं याःगु अपराधं आः छुत्कारा दइ, छायाधाःसा थ्व हे ज्याया लागि वय्कः सिनादी धुकल।

☆ 9:5 १:५ प्रस २५:१८-२२ ☆ 9:6 १:६ गन्ती १८:२-६ ☆ 9:7 १:७ लेवी १६:२-३४ ☆ 9:13 १:१३ लेवी १६:१५-१६; गन्ती १९:९,१७-१९

16 इच्छापत्रय च्वया तः थें याये न्ह्यः इच्छापत्र च्वया ब्यूम्ह मन् सी धुंकल धकाः दसि क्यनेमाः।

17 इच्छापत्र च्वया ब्यूम्ह मन् म्वाना च्वंतले इच्छापत्र ज्यालगय् जुइ मखु। च्वया ब्यूम्ह मन् सीधुंकाः तिनि ज्यालगय् जुइ।

18 अयजूगुलि न्हापायागु बाचा नं हि छवाकाः हे चिनातःगु खः।

19 मोशां व्यवस्थाय् च्वयातःगु फुक्क आज्ञा ब्वना न्यंकूबलय् दुगुचा व द्रुहंचायागु हि त्वाकछ्यानातःगु लः, हिसप घॉय् व ह्याउँगु ऊनं व्यवस्थायागु सफुलिइ व मनूतयत थथे धकाः हा यात –

20 “परमेश्वरं छिमित आज्ञा बियादीगु बाचायागु हि थ्व हे खः।”☆

21 थथे हे मोशां पाल व सेवा यायेत छ्यलेमाःगु फुक्क थलबलय् नं हिं हा हा यात।☆

22 धात्थें हे व्यवस्थायाकथं हि फुक्कयात शुद्ध याइ, अले हि महायकं पाप क्षमा जुइ मखु।☆

ख्रीष्ट सिनादीगुलि पाप हुया वनी

23 स्वर्गयागु किपालु थें जक यानाः दय्कातःगु थ्व फुक्कयात थथे हिं शुद्ध याये हे माः। अथे हे स्वर्ग्य च्वंगुयात ला थ्व स्वयाः भिंगु बलिदानं शुद्ध यायेमाः।

24 ख्रीष्ट मनूतयसं स्वर्गयागु किपालु थें जक यानाः दय्कातःगु महा-पवित्रगु थाय् दुने मखु, बरु झीगु निंति स्वर्ग्य हे परमेश्वरया न्ह्यःने झायादीगु दु।

25 दकलय् तःधंम्ह पुजाहारी दँय्दसं थःगु हि छायेत मखु, बलि बियाः हि छायेत परमेश्वरयागु न्ह्यःने वनी। ख्रीष्ट ला थःगु हि मखु तर मेपिनिगु हि छायेत महा-पवित्रगु थासय् झायादी।

26 थथे झाःझाः पति झायेमाःगु जूसा ला ख्रीष्ट संसारयागु सृष्टि जूसानिसें तःकः मछि दुःख सी मालिगु खः। तर वय्कः संसारयागु अन्त जुइ त्ययक्काः आः सदांयात छकलं झायाः मनूतयगु पाप हुया छवयेत थः हे बलिदान जुयादिल।

27 मन् छकः सी, अले सीधुंकाः वयागु न्याय जुइ।

28 अथे हे तःम्हयसिगु पाप हुया छवयेत ख्रीष्ट नं छकः सिनादिल। वय्कः निक्वः खुसि नं झाइतिनि। उबलय् वय्कः पाप हुया छवयेत मखु, बरु वय्कःयागु लँ स्वयाच्चवंपिन्त बचय् यायेत झाइ।☆

10

ख्रीष्टं छता हे जक बलि बियादिल

1 व्यवस्था थः हे पूमवं, थ्व ला लिपा वइगु बांलाःगु खँया किपालु जक खः।
अयजूगुलि दँयदसं बलि बीवं मनूत परमेश्वरया न्ह्यःने शुद्ध जुइ फइ मखु।

2 बलि बीवं शुद्ध जुइगु खःसा छाय् हानं बलि बी माल? थुकिं शुद्ध जुइगु खःसा
ला बलि बीगु ज्या दिके माःगु खः। थज्याःम्ह मनूयागु नुगलं वयात हानं पापी ठहरय्
मयायेमाःगु खः।

3 थथे बलि बियाः ला झन जक हे दँयदसं थःगु पाप लुमंके थें जुइ।

4 द्रुहंत व दुगुचातयगु हिं गुब्सं पाप ह्याछवये फइ मखु।

5 उकिं हे ला खः नि, थ्व संसारय् झाये धुंकाः ख्रीष्टं परमेश्वरयात थथे धयादीगु

“बलि बीगु व छाय्छी यायेगु ज्यां

छि लयमताः

अयनं छि जिगु निंति

छगू म्ह तयार यानादीगु दु।

6 छिं होमबलि व शुद्ध जुइगु बलि नं
ययकामदी।

7 उकिं जिं धया –

‘जि वये धुन,

व्यवस्थाय् जिगु बारे

च्वया तः थें हे,

जि परमेश्वर!

छिगु इच्छा पूवकेत

जि वये धुन।’ ”☆

8 न्हापां ला वयकलं थथे धयादिल – “बलि बीगु व छाय्छी यायेगु ज्यां छि
लयमता। होमबलि व शुद्ध जुइगु बलि छिं ययकामदी।” (गुगु व्यवस्थाय् च्वया
तःकथं याइगु खः)

9 लिपा हानं थथे धयादिल – “स्वयादिसँ, छिगु इच्छा पूवकेत जि वयाच्चनागु
दु।” थथे ख्रीष्टं न्हापायागु बलि बीगु ज्या मदयकाः थः हे बलि जुयादिल।

10 थुकथं वयकलं परमेश्वरयागु इच्छा पूवकादिल। सदांयात गाक्क छकलं थःत हे बलि बियाः वयकलं झीगु पाप मदय्का छवयादिल।

11 फुकक पुजाहारीत न्हियान्हिथं परमेश्वरयाथाय बलि बीगु ज्या यानाच्चनी। अले इमिसं न्ह्याबले छता हे बलि बियाच्चनी। थुकथं बलि बीगु ज्यां गुब्सं पाप हुयाछवये फइ मखु।*

12 ख्रीष्टं धाःसा पापयागु नितीं सदांयात गाक्क छता हे जक बलि बियादिल। अले वयकः परमेश्वरयागु जवय च्वनादीगु दु।

13 परमेश्वरं वयकःया शत्रुतयूत वयकःयागु पालि तःले तया मदितले वयकः अन हे पिया च्वनादी।*

14 पापं शुद्ध जूपिन्त वयकलं छगू हे बलिदानं सदांया लागि सिद्ध यानादिल।

15 थ्व हे खँय् पवित्र आत्मां नं थथे धकाः साक्षी बियादीगु दु –

16 “परमप्रभुं धयादिल –

उबलय् जिं इपिं नाप

चीत्यनागु बाचा थ्व हे खः –

जिं थःगु नियम इमिगु मनय्

थयंक तयाबी,

अले इमिगु नुगलय् नं च्वयाबी।”*

17 वयकलं हानं धयादिल –

“जिं इमिगु पाप

व इमिसं याःगु मभिंगु ज्याखँ

हानं लुमंके मखुत।”

18 थुकथं पाप क्षमा जुइ धुंकाः पाप हुया छवयेत हानं बलि बीमाःगु मन्त।

परमेश्वरया न्ह्यःने वनेनु

19 अयज्गुलि यःपिं दाजुकिजापिं, येशूयागु हिं यानाः महा-पवित्रगु थासय् वनेत झीत छुं पंगलः मन्त।

20 पर्दा अथे धइगु वयकःयागु म्हं झीत छपु न्हगु व जीवन दुगु लँपु चाय्कादीगु दु।

21 परमेश्वरया छँय् झी छम्ह तःधंम्ह पुजाहारी दीगुलि

22 पवित्रगु लखं म्ह शूद्र याना: बांमला:गु व मभिंगु खँ मतिइ मतसे, नुग: यचुका: व विश्वासय् बल्लाना: झीपिं परमेश्वरया न्ह्य:ने वनेनु।*

23 थ:पिन्सं यानागु आशायात झीसं बल्लाका च्वनेमा:, छायाधा:सा झीत बचं बियादीम्ह विश्वास याये बह:म्ह ख:।

24 झीसं थ:थवय् माया यायेगु व भिंगु ज्या यायेगु मनय् तयेमा:।

25 गुम्हं गुम्हय्सिगु संगतिइ मवनेगु बानी दइ, झीपिं धा:सा छथाय् मुनेगु त्व:ते मज्यु। अज्ज ला प्रभु झायादीगु दिं न्ह्य:ने वयेत्यंगु दु धका: सीका: थ:थवय् साहस बीगु यायेमा:।

26 सत्य छु ख: धयागु सीधुंका: नं झीसं पाप याना जुल धा:सा झीगु पाप ह्याछवयेगु गुगुं बलिदान हे दइ मखुत।

27 थुकिया पलेसा पाप या:म्हय्सिनं परमेश्वरयागु सजाँय फयेमाली। व सजाँयया मिं परमेश्वरया विरोधीतयत् भस्म यानाबी।*

28 मोशायागु व्यवस्था मानय् मयाइम्ह मनूयात निम्ह स्वम्ह मनूखं साक्षी बिल धा:सा दया मतसे स्यानाछवइ धा:सा*

29 परमेश्वरया काय्यात पालि त:ले च्वंगु धू ताय्कीपिन्त, थ:त पवित्र या:गु बाचायागु हियात अशूद्र ताय्कीपिन्त व दया यानादीम्ह पवित्र आत्मायात हेस्याइपिन्त गुलि जक अप्व: सजाँय बी। छिमिसं हे बिचा: या।*

30 “बदला कायेगु ज्या जिगु ख:,
जिं हे बदला काये,”

धयादीम्हयसित झीसं म्हस्यु। थथे नं धयात:गु दु –

“परमप्रभुं हे वय्क:या मनूतयत्
न्याय यानादी।”*

31 म्वा:म्ह परमेश्वरया ल्हातिइ लायेगु तसकं ग्यानापुगु खँ ख:।

32 न्हापायागु खँ छक: लुमकि – भिंगु खँ न्यने धुंका: व परमेश्वरयागु ज: काये धुंका: छिमित गुलि दु:खकष्ट जूवल। अयनं छिमिसं विश्वास यायेगु मत्व:तू।

33 म्ब:क:मछि ला छिमित फुक्कसिगु न्ह्य:ने बेइज्जत यात, अले हानं ग्व:क: ला थथे दु:ख फये मा:पिं लिसे जुइ माल।

* 10:22 १०:२२ लेवी ८:३०; इज ३६:२५ * 10:27 १०:२७ यशै २६:११ * 10:28 १०:२८ व्य १७:६; १९:१५ * 10:29 १०:२९ प्रस २४:८ * 10:30 १०:३० व्य ३२:३५-३६

34 इयालखानाय् लाःपिन्त छिमिसं दयामाया यानाः ग्वाहालि यात, अले हानं छिमिगु सम्पति लुतय् यानाकाःसां छिपिं लय्ताया हे च्वन, छाय्धाःसा छिमिके सदां दयाच्चनीगु दक्वसिबय् तःधंगु सम्पति दु धकाः छिमिसं स्यु।

35 अयजूगुलि छिमिसं साहस यायेगु त्वःते मते। छिमिसं थुकियागु तःधंगु इनाम काये खनीतिनि।

36 परमेश्वरयात यःगु ज्या यायेत व वय्कलं बियादी धकाः धयादीगु कायेत छिमिसं नुगः क्वातुका च्वँ।

37 धर्मशास्त्रय् च्वयातःगु दु –

“आः झाइम्ह मनु झाया हे दी,
लिबाकादी मखु।

38 जिम्ह धर्मी मनु धाःसा
विश्वास हे म्वाइ।
सुनानं जितः त्वःतावन धाःसा
जिं वयात ययके मखु।”☆

39 झीपिं अथे विश्वासं लिचिलाः स्यना वनीपिं मनूत मखु, बरु विश्वासं म्वाका तःपिं खः।

11

विश्वास

1 आशा यानागु खँ दइ धकाः दुक्क जुइगु व मखंगु खँ धात्थे दु धकाः धायेगु हे विश्वास खः।

2 विश्वासं यानाः हे न्हापायापिं मनूतयूत परमेश्वरं ययकादिल।

3 विश्वासं हे झीसं सीके फु, परमेश्वरं उजं बियादीगुलि संसारयागु सृष्टि जुल, अले थुकथं खने मदुगुलि खनेदयावल।☆

4 विश्वासं हे हाबिलं परमेश्वरयात कयिनयागु स्वयाः भिंगु बलि छाल। विश्वास यानाः हे व परमेश्वरया न्ह्यःने ठीक ठहरय् जुल। अले वं छाःगु नं परमेश्वरं ययकादिल। विश्वास यानाः हे हाबिल सी धुंकूसां झीपिलिसे नवानाच्वंगु दु।☆

☆ 10:38 १०:३७-३८ हब २:३-४ ☆ 11:3 ११:३ उत १:१; भज ३३:६,९; यूह १:३ ☆ 11:4 ११:४ उत ४:३-१०

5 विश्वासं हे हनोकयात मसीकं स्वर्गय् थत यंकल। परमेश्वरं हे थत यंकादीगुलि वयात सुनानं लुइके मफुत। वयात थत यंके न्ह्यः वं परमेश्वरयात लय्ताय्कूगु खः।✧

6 विश्वास मयाय्कं परमेश्वरयात लय्ताय्के फइ मरखु। वय्कःयाथाय् वइम्ह मनुखं परमेश्वर दि, अले वय्कःयात मालिपिन्त वय्कलं इनाम बियादी धकाः विश्वास याये हे माः।

7 विश्वासं हे नोआं परमेश्वरयागु खँ न्यन। परमेश्वरं वयात गुब्सं मखंनिगु, लिपा जुइतिनिगु खँ धयादीगु खः। परमेश्वरं धयादी थें वं सियागु तःग्वःगु जहाज दय्कल। अले उकी हे च्वनाः वं थः जहानपिन्त बचय् यात। थुकथं विश्वास यानाः वं संसारं द्रूकूगु खँ क्यनाबिल, अले व थः परमेश्वरया न्ह्यःने ठीक ठहरय् जुल।✧

8 विश्वासं हे अब्राहामं परमेश्वरयागु खँ न्यन। परमेश्वरं वयात सःताः थःम्हं बी धकाः धयादीगु देशय् हँ धकाः उजं बियादिल। गन वनेगु धकाः मसीकं हे वं थःगु देश त्वःतावन।✧

9 विश्वासं हे अब्राहाम परमेश्वरं बियादी धकाः धयादीगु देशय् वन, अले अन परदेशी थें जुयाः पाल ग्वयाः च्वन। अथे हे वया काय् इसहाक, अले छय् याकूब नं परमेश्वरं बियादी धकाः धयादीगुलि पाल ग्वयाः च्वंच्वन।✧

10 अब्राहाम ला सदां दयाच्चनीगु जगय् परमेश्वरं हे दय्कादीगु शहरय् च्वनेत पियाच्चंम्ह खः।

11 विश्वासं हे बुरा जुइ धुंकाः नं अब्राहाम अबु जुइ फत। बाचा चिनादीम्ह परमेश्वरयात विश्वास याःगुलि बुरी जुइ धुंकासां साराया प्वाथय् दत।✧

12 थुकथं सीत्यःम्ह बुराम्ह अब्राहामपाखें आकाशय् च्वंगु नगु थें यक्व, अले फिसलय् च्वंगु फि थें ल्याः खाये मफय्क सन्तान दत।✧

13 इपिं फुक्कं विश्वास जक यानाः परमेश्वरं बी धकाः धयादीगु काये मखंकं सिनावन। अथेसां परमेश्वरं बी धकाः धयादीगु खँय् इमिसं विश्वास याः। इमिसं थःपिन्त पृथ्वीया लँजुवाःत जक ताय्कल।✧

14 थथे धया जुइपिन्सं थःगु देश मालाच्चंगु दु धकाः सी दु।

15 इमिसं थःपिन्सं त्वःता वंगु देश लुमंकूगु जूसा इपिं हानं व हे देशय् लिहां वने दइगु खः।

✧ **11:5** ११:५ उत ५:२१-२४ ✧ **11:7** ११:७ उत ६:१३-२२ ✧ **11:8** ११:८ उत १२:१-५ ✧ **11:9** ११:९ उत ३५:२७ ✧ **11:11** ११:११ उत १८:११-१४; २१:२ ✧ **11:12** ११:१२ उत १५:५; २२:१७; ३२:१२ ✧ **11:13** ११:१३ उत २३:४; १ इति २९:१५; भज ३९:१२

16 तर इमिसं व स्वयाः भिंगु व बांलाःगु स्वर्गयागु देशय् वनेगु मनंतुनाच्वंगु दु। उकिं परमेश्वरं नं थःत इमि परमेश्वर खः धकाः धयादीत लज्या चायामदी, छायाधाःसा वयक्कलं इमिगु निरिति छगु शहर हे दयकादीगु दु।

17 अब्राहामयात जाँचय् याःबलय् वं विश्वास यानाः थः हे काय् इसहाकयात बलि बीत स्वत। परमेश्वरं बियादी धकाः धयादीगु खँय् विश्वास यानाः हे वं थः याकः काययात बलि बीत्यंगु खः।✧

18 थ्वयागु हे बारे परमेश्वरं वयात थथे धयादिल – “इसहाकयापारखें हे छं सन्तान दयावइ।”✧

19 परमेश्वरं सीम्ह मनूयात हानं म्वाकादी फु धकाः अब्राहामं विश्वास यानाः थथे इसहाकयात बलि बीत्यंगु खः। उकिं अब्राहामयात ला छगूकथं इसहाक सिनाः म्वानावःम्ह थें हे जुल।

20 विश्वासं हे इसहाकं याकूब व एसावयात लिपा जुइतिनिगु खँयागु निरिति आशिष बिया थकल।✧

21 विश्वासं हे याकूबं सीत्यय्काः तुतामं चुयाः परमेश्वरयात तःधंकाः योसेफया निम्ह कायपिन्त आशिष बिया थकल।✧

22 विश्वासं हे योसेफं सीत्यय्काः इस्त्राएलीतयत् परमेश्वरं मिश्र देशं लिंगना यंकादी धकाः धया थकल। अले थःगु सीम्हयात कनान देशय् थुने यंकि धकाः नं धया थकल।✧

23 विश्वासं हे मोशा बूबलय् बांलाःगुलि वया मांबौपिन्सं जुजुयागु उजं खनाः मग्यासे मचायात बुयाः स्वला तक सुचुका तल।✧

24 विश्वासं हे मोशां तःधिकः जुइ धुंकाः फारोहया म्हायाया काय् मखु धकाः धाल।✧

25 पापय् च्वनाः पलख मोजमज्जा यायेगु स्वयाः परमेश्वरया मन्तूलिसे दुःखकष्ट फयेगु हे वं ययक्कल।

26 मिश्रयागु दक्व सम्पत्ति स्वयाः मुक्ति बीम्ह ख्रीष्टया निरिति हेला याका जुइगु हे वं तःधं तायक्कल, छायाधाःसा व परमेश्वरं बीगु सिरपाः कायेत पियाच्वंम्ह खः।

27 विश्वासं हे जुजुयागु तं खनाः मग्यासे मोशां मिश्र देश त्वःतावन। अले खने मदुम्ह परमेश्वरयात खं थें च्वंका नुगः क्वातुकाच्वन।✧

✧ 11:17 ११:१७ उत २२:१-१४ ✧ 11:18 ११:१८ उत २१:१२ ✧ 11:20 ११:२० उत २७:२७-२९, ३९-४० ✧ 11:21 ११:२१ उत ४७:३१; ४८:२० ✧ 11:22 ११:२२ उत ५०:२४-२५; प्रस १३:१९ ✧ 11:23 ११:२३ प्रस २:२; १:२२ ✧ 11:24 ११:२४ प्रस २:१०-१२ ✧ 11:27 ११:२७ प्रस २:१५

28 दक्वसिबय् न्हापां बूपिन्त स्याइम्हयसिनं इस्नाएलीतय् न्हापा बूपिन्त मथीमा धकाः मोशां विश्वासं हे छुत्काराया नखः मानय् यात, अले लुखाय् हि छ्वाकल।*

29 विश्वासं हे इस्नाएलीत बँय् न्यासि वने थें लाल समुद्र छिनावन। मिश्र देशय् च्वंपि नं अथे हे समुद्र छिनाः वंबलय् दुनाः सित।*

30 विश्वासं हे न्हयन्ह तक चाः हुले धुंकाः यरीहोया पःखाः दुनावन।*

31 विश्वासं हे राहाब धाःम्ह वेश्या परमेश्वरयात मानय् मयाःपि नाप सिनावने म्वाःल, छायाधाःसा वं चिवा कायके छ्वयाहःपि मन्तयत् लसकुस यात।*

32 थुलि अप्वः छु धाये? गिदोन, बाराक, शिमशोन, यिप्ता, दाऊद, शमूएल व अगमवत्तातयगु खँ ल्हानाः ब्याइ मखु।*

33 विश्वासं हे इमिसं देश देश त्याका काल। विश्वासं हे इमिसं बांलाक राज्य याना वन, अले विश्वासं हे परमेश्वरं बी धकाः धयादीगु काये खन। विश्वासं हे इमिसं सिहतयगु म्हुतुप्वाः तिकल।*

34 ह्वाना ह्वाना च्यानाच्वंगु मिं नं इमित छुं याये मफुत। तरवारं पालाः स्यायेत्यंबलय् नं इपिं बचय् जुल। बमलाःपिं इपिं, आः तसकं बल्लाना वल। भचा मन्यासे ल्वानाः इमिसं पिनें वःपिं शत्रुतयत् बिसिका छ्वत।*

35 विश्वासं हे मिसातयसं सीपिं थः मन्तयत् म्वानावःगु खन। मेपिन्सं नं गुब्सं सीम्वायक म्वाना वये दयेमा धकाः दुःखकष्ट फयाः हे सिनावन।*

36 गुलिसिनं हेस्याकाः जुइ माल, गुलिसिनं कोर्न दायके माल, अले गुलिसिनं चिकाः इयालखानाय् कुंके माल।*

37 अले गुलिसितं ल्वहँतं कयकाः स्यात, गुलिसितं निकू जुइक कःतिं फायाबिल, गुलिसितं तरवारं पालाः स्यात। अले गुलि मन्तयसं ला फै व दुगुयागु छेगूयागु वसः दयकाः पुनाजुल। अले चीमि जुयाः, दुःखकष्ट सियाः, क्वत्ययकाः जुइ माल।*

38 संसार इपिं च्वने बहःगु मजुल। इपिं मरुभूमिं मरुभूमिं, पहाडं पहाडं बिस्युं जुइ माल। अले गुफा गुफाय्, पाक्व पाक्वय् सुलाः जुइ माल।

☆ 11:28 ११:२८ प्रस १२:२१-३० ☆ 11:29 ११:२९ प्रस १४:२१-३१ ☆ 11:30 ११:३० यहो ६:१२-२१ ☆ 11:31 ११:३१ यहो २:१-२१; ६:२२-२५ ☆ 11:32 ११:३२ न्याय ६:११-८:३२; ४:६-५:३१; १३:२-१६:३१; ११:१-१२:७; १ शमू १६:१-१ राज २:११; १ शमू १:१-२५:१ ☆ 11:33 ११:३३ दान ६:१-२७ ☆ 11:34 ११:३४ दान ३:१-३० ☆ 11:35 ११:३५ १ राज १७:१७-२४; २ राज ४:२५-३७ ☆ 11:36 ११:३६ १ राज २२:२६-२७; २ इति १८:२५-२६; यर २०:२; ३७:१५; ३८:६ ☆ 11:37 ११:३७ २ इति २४:२१

39 विश्वासं यानाः हे इमिसं थथे सह याये फुगु खः। अयनं इमिसं परमेश्वरं बी धकाः धयादीगु काये मखं।

40 परमेश्वरं इतीत अज्ज भिंगु व बांलाःगु बियादीगु ग्वसाः ग्वयादीगु दु। इतीनापं तुं इपिं नं सिद्ध जुइमा धकाः परमेश्वरं मनंतुनादीगु खः।

12

परमेश्वर इती बाः

1 थुकथं इतीसं इतीगु प्यखें थुलिमछि विश्वासया साक्षीत खनाच्चनागु दु। अयजूगुलि इतीपिं नं इतीगु लँय वइगु न्ह्यार्थे ज्याःगु पंगः व अःपुक इतीत तक्क्यंकीगु पापयात चीकाः थयंकेमाःगु थासय् थयंक हे वने धकाः धैर्यं यानाः ब्वॉय् वनेनु।

2 अले इतीगु विश्वास शुरु यानादीम्ह व क्वचाय्कादीम्ह येशूयात स्व, लिपायागु आनन्दया निति वयकः लज्या मचासे क्रूसया सास्ती फयादिल। वयकः आः परमेश्वरया सिंहासनया जवय् च्वनादीगु दु।

3 पापी मन्तयपाखें वयकलं थुलिमछि दुःख गये यानाः सह यानादिल जुइ, व बिचाः या। उकिं छिपिं नं आशा त्वःताः लिचिले मते।

4 छिमिसं आः तकं पापलिसे हि बाः वयक ल्वाये माःगु मदुनि।

5 परमेश्वरं छिमित थःकाय्यात थें अतीं बियादीगु त्वःमंके धुन ला?

“जि यःम्ह काय्,

परमप्रभुं न्वानादीगु खँयात

छिमिसं बकंफुस्लु

ताय्के मते।

परमप्रभुं ब्वःबिल धकाः

छिमिसं आशा त्वःते मते,

6 छाय्धाःसा परमप्रभुं

माया यानादीम्हयूसित

न्वाना नं दी।

थःकाय् यानादीपिन्त

वयकलं सजाँय नं बियादी।”☆

7 परमेश्वरं न्वानादीगुलि छिमिसं सह यायेमाः। वयकलं छिमित काय् थें यानादीगु दु। अबुं न्वाना मतःम्ह काय् सु जक दइ?

8 वयकलं छिमित थथे न्वाना मदीगु जूसा छिपि वयकःया काय् जुइ मखु, बरु व्यभिचारं बूमह मचा थें जुइ।

9 झीत बुइका तःम्ह अबुं न्वाःथें झीपि च्वना, उकिं झीसं वयकःयात मानय् याना। छु झीसं झीत आत्माय् बुइकादीम्ह बाःयागु खँ झन अप्वः न्यने म्वाः ला?

10 झी अबुपिन्सं थःत यःकथं झीत छुं ई तक जक न्वानादिल। परमेश्वर बाःनं ला झी हे भिनेमा, अले वयकः थें पवित्र जुइमा धकाः न्वानादिल।

11 झीत थथे न्वानादीबलय् न्ह्याइपुसे ला च्वनी मखु, बरु दुःख जक जुइ। अथेसां लिपा तकं सह यानाच्चवनीपिन्त शान्ति दइ, अले परमेश्वरया न्ह्यःने नं ठीक ठहरय् जुइ।

परमेश्वरयागु खँ मन्यंपिन्त ख्याच्चः

12 अयजूगुलि त्यानुगु ल्हाः व बमलाःगु तुति बल्लाकि।*

13 माथवंगु लँय जु। बमलाःगु तुति खुत्यां मकायेमा, बरु लनेमा।*

14 फुक्कलिसे मिलय् जुयाच्चनेगु व पवित्र जुयाच्चनेगु कुतः या। पवित्र मजुइकं सुनानं प्रभुयात खनी मखु।

15 होश या, सुनानं परमेश्वरयागु दया माया काये मखंकाः च्वने म्वाःलेमा। मखुसा, बिख मां नुगलय् हा कयाः छिमित स्यंकाबी।*

16 सुनानं व्यभिचार याये मते। अले एसाव थें परमेश्वरयात मानय् मयाइम्ह जुइ मते। छछाःया निरिति एसावं थःगु हक नं मिल।*

17 छिमिसं सि हे स्यु, लिपा वं थः अबुयाके आशिष पवंबलय् काये मखन। वं थःम्हं म्युगु हक ख्वलं नं लिफयाना काये मफुत।*

18 छिपि परमेश्वरयाथाय् वनेगु थी फइगु सीनै पर्वतय् वये थें मखु। इस्राएलीत धाःसा मित्याः पिहां वयाच्चवंगु सीनै पर्वतय् वःगु खः। अन हाकुगु सुपाचं त्वपुयातःगु व ग्वःफय् वयाः खिउंसे च्वनाच्चवंगु खः।

19 अन इमिसं तुरही पुयाहःगु सः व परमेश्वरं न्वानादीगु सः ताल। वयकःयागु सलं तसकं ग्यानाः इमिसं आः हानं छसः हे न्वाना मदीमा धकाः बिन्ति यात।*

* 12:12 १२:१२ यशै ३५:३ * 12:13 १२:१३ हितो ४:२६ * 12:15 १२:१५ व्य २९:१८

* 12:16 १२:१६ उत २५:२९-३४ * 12:17 १२:१७ उत २७:३०-४० * 12:19 १२:१८-१९ प्रस

१९:१६-२२; २०:१८-२१; व्य ४:११-१२; ५:२२-२७

20 “श्व पर्वतयात पशुतयसं जक थ्यूसां ल्वहँतं कय्काः स्यानाब्यु” धकाः उजं बियादीगुलि इपिं झन तसकं ग्यात।☆

21 उब्लय् तसकं ग्यानापुसे च्वंगुलि मोशांनापं थथे धाल – “जि ला ग्यानाः थरथर हे खात।”☆

22 छिपिं ला म्वाःम्ह परमेश्वरयागु स्वर्गयागु शहर यरूशलेम, सियोन पर्वतय वःगु दु। अन व्रलंद्रः स्वर्गदूतत लयल्यतातां मुनाच्चंगु दु।

23 अन स्वर्गय् नां च्वयातःपिं, परमेश्वरया दकलय् तःधिकःम्ह काय्यात विश्वास याना च्वंपिनिगु पुचलय् छिपिं दुथ्याःगु दु। फुक्क मनूतयत न्याय यानादीम्ह परमेश्वर दीथाय् छिपिं वःगु दु। अन धर्मीं मनूया सिद्ध जुइ धुंकूपिं आत्मात नं दु।

24 छिपिं न्हूगु बाचा चिनाः परमेश्वर व मनूतय् दथुइ च्वनादीम्ह येश्याथाय् व बदलाया लागि हालाच्चंगु हाबिलया हिया पलेसा क्षमा या निति नवाइगु हाः हाः याःगु हिया थासय् वःगु दु।☆

25 होश या, छिपिलिसे नवानादीम्हयसिगु खँ मन्यंसे च्वने मते। श्व संसारय् च्वनाः परमेश्वरयागु खँ न्यंकीम्हयसिगु खँ मन्यंपिन्त ला मल्यंकू धासेलि स्वर्ग हे नवानादीम्हपाखे फस्वया जुइपिन्त जक ल्यंकी ला?☆

26 उब्लय् वय्कःयागु सलं पृथ्वी हे लिंगिलिगि सन। वय्कलं आः श्व बचं बियादीगु दु –

“पृथ्वी जक मखु,
जिं आः छकः हानं
आकाशयातनापं
संकाबी।”☆

27 थन “आः छकः हानं” धयागु सृष्टि याना तःगुयात संकेगु व मदय्केगु धकाः धाःगु खः। अथे खःसा मसनिगु जक ल्यनी।

28 अयजूगुलि संके हे फइ मखुगु राज्यय् दुथ्याकादीगुलि झीसं परमेश्वरयात सुभाय् बियाः वय्कःयात यइपुक तःधंकाः सेवा यायेमाः।

29 झीम्ह परमेश्वर भस्म याना छवइम्ह मि खः।☆

☆ 12:20 १२:२० प्रस १९:१२-१३ ☆ 12:21 १२:२१ व्य ९:१९ ☆ 12:24 १२:२४ उत ४:१०

☆ 12:25 १२:२५ प्रस २०:२२ ☆ 12:26 १२:२६ हाग २:६ ☆ 12:29 १२:२९ व्य ४:२४

13

परमेश्वरयात गय् यानाः लय्तायकेगु?

1 दाजुकिजापिं, थःथवय् माया यायेगु त्वःते मते।

2 पाहां वःपिन्त दुकायत् थाकुचाय् मते। थथे यानाः गुलिसिनं सि हे मस्युसे
स्वर्गदूततयत् दुकाःगु दु।*

3 थःत नं कुना तःगु थें हे तायकाः कुना तःपिनिगु च्यूताः ति। दुःख सियाच्च्वपिन्त
थःम्हं हे दुःख सियाच्च्वना थें च्वंक लुमंकेगु या।

4 ब्याहायात सकसिनं तःधंकेमाः। निम्हतिपूया दथुइ थःथवय् विश्वास दयेमाः,
छाय्धाःसा व्यभिचार याइपिन्त व ब्याहा याये धुंकाः नं मेपिं नाप जुयाः स्यनिपिन्त
परमेश्वरं न्याय यानादी।

5 छिमिगु जीवनय् धिबायागु लोभं तापाक च्वँ। थःके गुलि दु उलि हे लुधंका
च्वँ। परमेश्वरं धयादीगु दु –

“जिं छिमित गुबलें

त्वःते मखु,

जिं छिमित गुबलें

त्यागय् याये नं मखु।”*

6 अय्जूगुलि झीसं संका मयासें धायेफु –

“प्रभु जितः ग्वाहालि

यानादीम्ह खः।

जितः ग्याये माःगु मदु।

मनूतयस्सं जितः

छुं हे याये फइ मखु।”*

7 छिमित परमेश्वरयागु वचन स्यनीपिं गुस्तयत् लुमंकी। इपिं गुकथं म्वानाच्च्वन,
व स्वयाः छिमिसं नं इमिसं थें हे विश्वास यायेगु या।

8 येश् ख्रीष्ट म्हिगः नं थौं नं अले सदां उर्थे हे जुयादी।

9 थीथी कथंया अजू चायापुगु स्यनातःगु खं छिमित मखुगु लँय् यंके मफयेमा।
नयेत्वनेगुलि मखु, बरु परमेश्वरयागु दया मायां थःगु मनयात बल्लाकि, छाय्धाःसा
नयेत्वनेगुलिइ जक जुयाच्च्वपिन्त गुब्सं भिं जूगु मदु।

* 13:2 १३:२ उत १८:१-८; १९:१-३

* 13:5 १३:५ व्य ३१:६,८; यहो १:५

* 13:6 १३:६ भज

10 झीगु छगू वेदी दु, गुकी छायेहःगु बलिपाखें पवित्र पालय् ज्या याइपि पुजाहारीतयसं नये मज्यु।

11 दकलय् तःधंम्ह पुजाहारी महा-पवित्रगु थासय् बलियागु हि छाये यनी। अले बांयागु म्ह जक छाउनीं पिने यनाः उनाछवइ।☆

12 अथे हे येशूयात नं शहरयागु ध्वाखां पिने यंकाः स्यात। वय्क्लं थःगु हिं मनूतय्गु पाप हुया छवयेत थथे याकादिल।

13 अयजूगुलि झीपिं नं वय्कःया निंति हेला फयाः ध्वाखां पिने वय्कःयाथाय् वनेनु।

14 झीगु निंति थन सदां दयाच्चनीगु शहर मदु। झीपिं ला लिपा वइगु शहरयागु लँ स्वया च्वनापिं खः।

15 अयजूगुलि झीसं सदां ख्रीष्टया नामय् परमेश्वरयात तःधंकेमाः। थ्व झीगु म्हतुं वय्कःयात छाइगु बलि खः।

16 मेपिन्त भिका जुइगु व ग्वाहालि यायेगु ल्वःमंके मते। थज्याःगु बलि हे परमेश्वर लयतायादी।

17 छिमिसं मण्डलीया थकालिपिनिगु खँ न्यँ, अले इमिसं धाःथें च्वँ, छायाधाःसा इमिसं थःगु ज्याया ल्याःचाः परमेश्वरयात क्यनेमाःगुलि छिमित बांलाक हेरचाह याना तइ। इमित थःगु ज्या लसतां याकेब्यु, इमित नुगलय् स्याके मते। मखुसा छिमित हे बांलाइ मखु।

18 जिमिगु निंति प्रार्थना याना हे च्वँ। जिमित विश्वास दु, जिमिगु नुगः यचुसे च्वँ, छायाधाःसा जिमित बांलाःगु ज्या जक याये मास्ति वः।

19 जि छिमिथाय् याकनं वये फयेमा धकाः छिमिसं जिगु निंति दुनुगलानिसें प्रार्थना याना च्वँ।

प्रार्थना

20 परमेश्वरं तःधंम्ह फैजवाः
झी प्रभु येशूयात सीम्हं
हानं म्वाकादीगु दु।

अले वय्कःयागु हे हिं
शान्ति बीम्ह परमेश्वरं
झीपिलिसे सदांया निंति
बाचा चिनादीगु दु।

21 थ्व हे परमेश्वरं छिमित
 वय्कःयात लयताय्केत
 माक्व भिंगु बांलाःगु
 फुक्कं बियादीमा।
 थुकथं येशू ख्रीष्टपाखें
 झीपिं वय्कःयात यय्क
 म्वानाच्च्वने फयेमा।
 वय्कः सदां तःधना च्वनेमा।
 आमेन।

22 यःपिं दाजुकिजापिं, चिचाहाकय्क जूसां जिं छिमित च्वयागु थ्व अतीं
 छिमिसं बांलाक न्यना का।

23 झी किजा तिमोथीयात त्वःता हःगु खँ जिं छिमित सीके बियाच्च्वना। व थन
 याकनं वल धाःसा जि वयात ब्वनाः आम्कन वये।

24 छिमि थकालिपिन्त व आम्कन च्वंपिं फुक्क विश्वासीतयत् ज्वजलपा
 धयाब्यु। इटालियाय् च्वंपिं विश्वासीतयसं नं छिमित ज्वजलपा धयाहःगु दु।

25 छिपिं फुक्कसितं परमेश्वरं दया माया यानादीमा। आमेन।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7